



Sumáriu Kazu
Tribunál Distritál Dili
Jullu 2020

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu sira ne'ebé JSMP monitoriza hamutuk: 27

| Artigu | Tipu kazu | Númeru |
|--|---|--------|
| Artigu 145 Kódigu Penál (KP) no konjuga ho artigu 2, 3, 35(b) no 36 LKVD | Ofensa ba integridade física simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku) | 13 |
| Artigu 154 KP | Maus-tratus ba kónjuje | 2 |
| Artigu 177, 182 KP | Abuzu seksuál ba menór ho agravasaun | 1 |
| Artigu 172 no artigu 172 (a) KP | Violasaun seksuál ho agravasaun | 1 |
| Artigu 183, 157 KP | Devasa no ameasa | 1 |
| Artigu 295, 274, 296, 303 | Pekulatu, administrasaun danoza, pekulatu ho uzu, falsifikasaun ba dokumentu ka notasaun téknika | 1 |
| Artigu 304 KP | Falsifikasaun agravada | 1 |
| artigu 316 nú. 1 no 2 KP | Kontrabandu | 1 |
| Artigu 171 KP | Koasaun seksuál | 1 |
| artigu 260 KP | Danu ho violénsia | 1 |

| | | |
|--|-----------------------------------|-----------|
| artigu 252 nú. 1(a) KP | Furtu agravadu | 1 |
| Artigu 316 KP | Ofensa ba kreditu nia naran di'ak | 1 |
| Artigu 1757, 1758, 1759, 1762, 1765, 1786, 1782, 1804, 1805 KS | Ezersísiu podér paternal | 2 |
| Totál | | 27 |

2. Totál desizaun ne'e bé JSMP monitoriza hamutuk:

| Tipu pena | Artigu sira | Númeru |
|--|--------------|-----------|
| Suspensaun ba prizaun nia ezekusaun | Artigu 68 KP | 5 |
| Pena multa | Artigu 67 KP | 6 |
| Pena admoestasaun | Artigu 82 KP | 3 |
| Suspensaun ba prizaun nia ezekusaun no absolve | Artigu 68 KP | 1 |
| Omologa | | 3 |
| Totál | | 18 |

3. Totál kazu sira ne'ebé adia tuir JSMP nia monitorizasaun: 1

| Razaun adiamentu | Númeru adia |
|--|-------------|
| Arguidu no lezada la kumpri notifikasaun | 1 |
| Totál | 1 |

4. Totál kazu sira ne'ebé sei kontinua prosesu tuir JSMP nia monitorizasaun: 8

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu : 0157/19 DIDIL
 Kompoziasaun Tribunál : Singulár
 Juis : Dr. João Ribeiro
 Prokuradór : Dr. Simão Brites Seixas
 Defeza : Dr. Jonas Henrique da Costa
 Desizaun : Pena admoestasaun

Iha 03 Jullu 2020, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JCL hasoru nia oan fetu no nia feen, iha Munisípiu Dili.

Akuzsaun Prokuradór

Prokuradór akuza katak iha 18 Jullu 2019, iha oras tuku 09:00 dadeer, arguidu foti ai-sanak ida no baku nia oan feto nia ain kabun parte loos no karuk rezulta moras no mean. Haree ne'e, arguidu nia feen ba impede nune'e arguidu foti ai-pedasuk ida no baku fali nia feen iha hasan parte loos halo lezada monu ba rai no tuku dala ida iha kabaas parte loos. Aktu sira ne'e rezulta moras.

Prokuradór akuza arguidu kontra artigu 145 kona-ba krime ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(b) no 35(a) LKVD no akuza mós arguidu kontra artigu 35 kona-ba krime iha konkursu.

Produsaun ba prova sira

Arguidu konfesa integralmente ba faktu sira iha akuzasaun no deklarata katak nia baku nia oan feto atu hanorin tanba arguidu haruka ba sosa sigaru maibé arguidu hein kleur lezada la ba sosa. Entretantu arguidu komete agresaun hasoru nia feen tanba nia feen halo impedimentu momentu ba arguidu baku sira nia oan ne'e no tuku dala ida iha arguidu nia kotuk laran. Ho nune'e, arguidu lori ai-loloon (ai-loloon prega ho lata ne'ebé uza hodi rega rai) no komete fali agresaun hasoru nia feen.

Arguidu mós deklarata katak sira di'ak malu ona, arrepende ninia hahalok, foin primeiravés baku lezada sira no promete sei la halo tan nia hahalok ne'e iha futuru.

Aleinde ne'e, lezada na'in rua mós kontinua konfirma faktu sira iha akuzasaun no konfirma mós ho arguidu nia deklarasaun katak sira di'ak malu ona to'o agora.

Alegasaun finál

Prokuradór konsidera arguidu provadu komete krime ho konkursu tanba komete krime hasoru nia oan no feen. Maibé tanba arguidu konfesa, arrepende ninia hahalok, di'ak malu ona ho lezada sira, foin primeiravés baku lezada sira inklui lezada sira mak provoka arguidu, nune'e husu ba tribunál atu aplika pena admoestasaun.

Entretantu defeza konkorda ho alegasaun prokuradór nian tanba arguidu konfesa, arrepende ona ninia hahalok, lezada sira mak provoka arguidu, di'ak malu ona ho lezada sira, foin primeiravés baku lezada sira no arguidu mak responsabiliza ba ninia família.

Desizaun

Depoisde avalia faktu hotu, tribunál prova katak arguidu lori ai-sanak ida no baku nia oan feto iha ain kabun parte loos no karuk. Tribunál mós prova katak arguidu lori ai-loloon ida no baku iha nia feen nia hasan parte loos halo lezada monu no tuku dala ida

iha kaba'as parte loos. Antes ne'e, arguidu nia feen tuku dala ida iha arguidu nia kotuk laran.

Bazeia ba faktu provadu sira ne'e hotu no tetu sirkunstánsia atenuante sira hanesan arguidu konfesa faktu sira, arrepende ona ninia hahalok no primeiravés baku lezada sira, nune'e tribunál konklui no kondena arguidu ho pena admoestasaun.

2. Krime ofensa ba integridade fízika simples ho natureza violénsia doméstika

Nú. Prosesu : 0485/19 DICMR
Kompozisaun Tribunál : Singulár
Juis : Dr. Argentino Luísa Nunes
Prokuradór : Dr. Gustavo Agostu da Silva Moreira
Defeza : Dr. José da Silva
Desizaun : Pena multa US\$45.00

Iha 03 Jullu 2020, Tribunál Distritál Dili, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CSM hasoru nia feen, iha Distritu Dili.

Akuzasaun Prokuradór

Prokuradór akuza katak iha 03 Setembru 2019, iha oras tuku 20:00, lezada telefone ba arguidu tanba sira nia oan moras maibé arguidu la foti telefone. Hafoin iha loron tuir mai iha 04 Setembru 2019, iha oras tuku 18:00 lokraik arguidu foin fila ba uma no lezada husu kedas arguidu nia telefone no tuda ba rai. Arguidu foti telefone ne'e no tau tiha iha meza leten no foti martelu no tuku telefone refere to'o rahun. Depoizde tuku rahun tiha telefone ne'e, arguidu kontinua uza martelu ne'e no tuku dala tolu iha lezada nia kotuk laran rezulta kanek no bubu. Lezada halai ba liur no husu ajuda ba nia subriñu hodi tula lezada ba sentru Saúde Vera Cruz hodi halo tratamentu. Arguidu nia hahalok ne'e rezulta lezada sofre moras, bubu no kanek iha kotuk laran.

Prokuradór akuza arguidu kontra artigu 145 KP kona-ba ofensa integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente katak faktu sira iha akuzasaun ne'e loos hotu. Arguidu mós deklara katak depoizde akontesimentu ne'e sira di'ak malu kedas, arrepende ninia hahalok ne'e no promete la repete tan iha futuru.

Alende ne'e, lezada mós konfirma faktu sira iha akuzasaun inklui konfirma deklarasaun arguidu nian katak sira di'ak malu ona no to'o agora arguidu la halo tan ona agresaun hasoru lezada.

Alegasaun final

Prokurador haktuir katak arguidu konfesa integralmente ba faktu sira iha akuzasaun, foin primeiraves mai hatan iha tribunál, di'ak malu ona ho lezada, arrepende ninia hahalok no promete la komete tan nia hahalok ne'e iha futuru. Nune'e mós lezada konfirma katak sira di'ak malu ona no to'o agora arguidu la komete tan hahalok krime hasoru lezada. Bazeia ba konsiderasaun ne'e inklui tetu katak número violénsia doméstika kontinua aas, nune'e husu ba tribunál atu kondena arguidu tuir tribunál nia konviksaun hodi prevene krime sira iha futuru.

Enkuantu defeza husu ba tribunál atu aplika pena ne'ebé adekuaudu tuir arguidu nia sala no mós konsidera sirkunstánsia atenuante sira hanesan arguidu konfesa faktu sira, foin primeiraves mai hatan iha tribunál, di'ak malu ona ho lezada to'o agora, arrepende ninia hahalok no responsavel hodi sustenta família.

Desizaun

Depoisde avalia faktu hotu, tribunál prova katak arguidu ho martelu tuku dala tolu iha lezada nia kotuk laran. Bazeia ba prova ne'e no tetu sirkunstánsia sira hotu, tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$0.50 kada loraun durante período loraun 90. Tribunál mós aplika pena alternativa durante loraun 60 iha prizaun kuandu arguidu la selu pena multa refere.

3. Krime ofensa ba integridade física simples ho natureza violénsia doméstika

| | |
|----------------------|--|
| Nú. Prosesu | : 0642/19 DICMR |
| Kompozisaun Tribunál | : Singulár |
| Juis | : Dr. João Ribeiro |
| Prokurador | : Dr. Jacinto Babo |
| Defeza | : Dr. João de Carvalho |
| Desizaun | : Pena prizaun fulan 6 suspende ba tinan 1 |

Iha 03 Jullu 2020, Tribunál Distritál Dili prezide julgamentu leitura sentensa ba krime ofensa integridade física simples ho natureza violénsia doméstika ne'ebé envolve arguidu TF hasoru nia feen, iha Distritu Dili.

Akuzasaun Prokurador

Prokurador akuza katak iha 15 Novembru 2019, iha oras tuku 19:00 kalan, lezada simu telefone husi arguidu nia feton ne'ebé insulta lezada no ko'alia mós ba lezada dehan

“hau arguidu nia feen”. Ho nune'e, lezada husu ba arguidu no sira diskute malu to'o arguidu buti lezada nia kakorok, tuku dala tolu iha lezada nia ulun, hodi liman sikun fai dala rua iha lezada nia kidan, tuku dala ida iha kotuk laran, tuku dala ida iha kanuruk no rasta lezada ba rai. Aktu sira ne'e rezulta lezada sofre moras maka'as iha kakorok, ulun, kidan, kotuk laran no kanuruk. Lezada ba halo tratamentu mediku iha Sentru Saude Bairopite.

Prokurador akuza arguidu kontra artigu 145 KP kona-ba ofensa integridade fizika simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu hili direitu nonook. Entretantu, lezada kontinua konfirma faktu sira iha akuzasaun no hatutan katak antes agresaun ne'e, lezada ko'alia aat hasoru arguidu nia feton, nune'e arguidu buti lezada nia kakorok, tuku dala tolu iha lezada nia ulun, hodi liman sikun fai dala rua iha lezada nia kidan, tuku dala ida iha kotuk laran, tuku dala ida iha kanuruk no rasta lezada ba rai. Aktu sira ne'e rezulta lezada sofre moras maka'as iha kakorok, ulun, kidan, kotuk laran no kanuruk, lezada mos deklarata katak arguidu foin primeiraves mai hatan iha tribunál no arguidu husu ona deskulpa ba lezada no lezada mos perdua ona arguidu.

Testemuña MP nu'udar arguidu nia kuñada depoimenta katak arguidu ho lezada diskute malu no arguidu uza kapasete baku iha lezada nia kotuk laran, rakut lezada nia kakorok, tuku lezada nia kotuk laran no sira na'in rua dudu malu maibe lezada la monu tun ba rai. Testemuña mos haktuir katak arguidu foin primeiraves baku lezada, di'ak malu ona ho lezada no to'o agora la halo tan violensia hasoru lezada.

Alegasaun final

Prokurador haktuir katak mezmua arguidu hili direitu nonook maibe lezada kontinua konfirma arguidu ninia hahalok no testemuña mos konfirma, tanba ne'e la duvida katak arguidu komete krime hasoru lezada. Bazeia ba konsiderasaun ne'e inklui tetu mos sirkunstansia sira, husu ba tribunál atu aplika pena prizaun maibe suspende nia ezekeusaun ba arguidu.

Enkuantu defeza husu ba tribunál atu fo justisa ba arguidu tanba maski lezada konfirma katak arguidu halo duni agresaun maibe arguidu husu ona deskulpa, sira di'ak malu ona, arguidu foin primeiraves baku lezada no to'o agora arguidu la komete tan violensia hasoru lezada.

Desizaun

Depoisde avalia faktu hotu, tribunál prova katak arguidu tebe lezada iha kanotak, uza kapasete baku lezada nia kotuk laran no rakut lezada nia kakorok. Tribunál konsidera liu lezada no testemuña nia deklarasaun. Bazeia ba faktu sira ne'e hotu no tetu mós sirkunstánsia atenuante sira hanesan sira di'ak malu ona, foin primeiravés mai hatan iha tribunál no arguidu mak responsável ba nia família, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida inklui selu kustu judisiál US\$10.00.

4. Krime ofensa bá integridade física simples ho natureza violéncia doméstika

Nu. Prosesu : 0019/20 DIDIL
Kompozisaun Tribunal : Singulár
Juis : Dra. Ersília de Jesus
Prokuradór : Dr. Renato Bere Nahak
Defeza : Dr. Henrique João Martins
Desizaun : Pena multa US\$150.00

Iha 13 Jullu 2020, Tribunál Distritál Dili, prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu CJA hasoru nia feen, iha Munisípiu Dili.

Akuzasuan Prokuradór

Prokuradór akuza katak iha 27 Janeiru 2020, iha oras tuku 18:00 lokrik, lezada fila husi serbisu no hamanas modo atu han. Momentu hamanas hela modo ne'e, lezada rai tiha kanedok ne'ebé uza ba kedok modo ne'e iha *toples* leten hodi hein modo refere manas. Maibé arguidu mai no foti kanedok ne'e no soe tiha ba rai. Nune'e, sira diskute malu no lezada foti kanedok refere no baku iha arguidu nia kotuk laran, hafoin arguidu tuku dala rua iha lezada nia oin iha matan parte karuk halo lezada oin nakukun no monu ba rai. Arguidu mós tuku tan dala rua iha lezada nia kotuk laran. Aktu sira ne'e rezulta lezada sofre bubu, metan iha matan, ran sai husi inus no moras iha kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 (b) LKVD.

Produsaun ba prova sira

Iha julgamentu arguidu deklarara parsialmente katak nia la soe kanedok ba rai maibé nia tau tun ba iha semente (fatin tein nian) tanba arguidu atu foti masin-midar iha *toples* laran atu halo kafé, maibé lezada dehan katak fatin arguidu rai kanedok ne'e foer. Arguidu kontinua deklarara katak hafoin ne'e, lezada foti kanedok refere no baku arguidu

nia kotuk laran no lori tudik tuda arguidu maibé la kona tanba arguidu ses-an tiha. Tanba ne'e, arguidu basa dala ida iha lezada nia oin no tuku dala rua iha lezada nia kotuk laran.

Arguidu hatutan katak momentu arguidu haree lezada kanek no ran, arguidu husu kedas diskulpa ba lezada no atu lori kedas lezada ba ospital maibé lezada lakohi. Arguidu mós dehan katak foin primeiravés baku lezada, di'ak malu ona, arrepende ninia hahalok no promete sei la halo tan hahalok sira ne'e hasoru lezada.

Entretantu lezada kontinua konfirma faktu sira iha akuzasaun no deklarata katak arguidu soe duni kanedok ne'ebé lezada rai iha *toples* leten ba semente tein fatin nian ne'ebé foer tanba ne'e lezada la simu no lori kanedok ne'e baku iha arguidu nia kotuk laran. Lezada konfirma katak nia lori duni tudik tuda arguidu maibé la kona. Lezada hatutan katak depoisde akontesimentu ne'e sira fahe malu to'o agora maski kontaktu malu hanesan bain-bain, arguidu serbisu hanesan ofisial justisa no lezada serbisu iha Banku ida iha Gleno-Ermera. Lezada haktuir tan katak bain-bain kuandu sai serbisu iha lokraik lezada sempre tun mai Dili maibé depois problema ne'e lezada la tun ona mai Dili.

Alegasaun finál

Prokuradór konsidera arguidu provadu komete krime ofensa ba integridade física simples ho natureza violénsia doméstika. Prokuradór mós konsidera sirkunstánsia agravante hanesan arguidu nu'udar ofisial justisa ida tuir loloos hatene kona-ba lei maibé ho intensaun halo fali agresaun hasoru nia feen. Nune'e, maski arguidu konfesa, arrepende ona ninia hahalok no promete sei la halo tan hahalok iha futuro, maibé tanba kazu violénsia doméstika rejista aas iha teritóriu tomak, husu ba tribunál atu kondena arguidu ho pena prizaun tinan rua suspende ba tinan tolu atu prevene krime sira iha futuro.

Enkuantu defeza husu ba tribunál atu aplika pena multa ho konsiderasaun ba sirkunstánsia atenuante sira hanesan arguidu konfesa, kazu ne'e akontese tanba hetan provokasaun husi lezada, di'ak malu ona ho lezada no arguidu arrepende ona ninia hahalok ne'e.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia matan parte karuk, tuku dala rua iha lezada nia kotuk laran halo oin nakukun no monu tun ba rai. Tribunál mós prova katak antes arguidu komete aktu sira ne'e, lezada lori kanedok baku uluk iha arguidu nia kotuk laran no foti tan tudik natoon ida tuda arguidu maibé la kona.

Bazeia bá faktu provadu sira ne'e no tetu mós sirkunstánsia hotu-hotu, tribunál konklui no kondena arguidu ho pena multa US\$150.00, ne'ebé arguidu sei selu US\$1.00 kada loron durante loron 150. Tribunál mós fiksa pena alternativa loron 100 iha prizaun bainhira arguidu la selu pena multa ne'e.

5. Krime pekulatu, pekulatu ho uzu, administrasaun danoza no falsifikasaun ba dokumentus ka notasaun téknika¹

| | |
|----------------------|---|
| Nú. Prosesu | : 0035/15.PGCC |
| Kompozisaun Tribunál | : Koletivu |
| Juis | : Dra. Jumiaty Freitas, Dr. António Helder Viana do Carmo no Dra. Albertina da Conceição das Neves |
| Prokuradór | : Dr. Lidia Soares |
| Defeza | : Dr. Fernando Lopes de Carvalho, Dr. Cancio Xavier no Dra. Estaque Pereira Guterres |
| Desizaun | : Pena prizaun tinan 2 fulan 6 suspende ba tinan 2 fulan 6 no pena prizaun tinan 1 fulan 6 supsende ba tinan 1 fulan 6 |

Iha 13 Jullu 2020, Tribunál Distritál Dili halo re-julgamentu ba krime pekulatu, pekulatu ho uzu, administrasaun danoza no falsifikasaun ba dokumentu ka notasaun téknika ne'ebé envolve arguidu Gastão de Sousa nu'udar Ministru Obras Públiku, arguidu Diogo da Costa nu'udar Xefe Gabinete iha Ministériu Obras Públiku (MOP), arguidu Martinho Gusmão nu'udar Amu Parokia Igreja Manatuto no arguidu Jordão Maria de Jesus Sousa no Ferlio Afonso Badoloi Sousa (oan husi arguidu Gastão de Sousa), iha Distritu Dili.

Tribunál Distritál Dili halo re-julgamentu bazeia ba desizaun husi Tribunál Rekursu ne'ebé husu ba Tribunál Distritál Dili halo re-apresiasaun ba akordaun husi Tribunál Primeira Instánsia relaciona ho pedidu husi parte defeza ba arguidu Gastão de Sousa no arguidu Diogo da Costa.

Parte defeza halo rekursu iha Outubru 2018, tanba la konkorda ho Tribunál Primeira Instánsia nia desizaun ba iha arguidu nain rua ne'e relaciona ho krime pekulatu de uzu. Defeza nia fundamentu katak arguidu sira la tama kategoria hanesan “funsonáriu” tanba pozisaun arguidu sira nu'udar kargu polítiku ne'ebé mai husi nomeasaun polítiku. Entretantu konseitu funsonáriu mai husi prosesu rekrutamentu. Bazeia ba fundamentu ne'e, defeza husu ba tribunál rekursu tenke absolve arguidu na'in rua.

¹ Bele asesu prosesu kazu ne'e tomak husi TDD nu'udar Tribunál Primeira Instánsia iha JSMP nia website jsmp.tl :https://jsmp.tl/wp-content/uploads/SumariuKazuTribunalDistritalDILI_TETUM.pdf

Alegasaun finál

Prokuradór no defeza laiha opozisaun.

Desizaun

Iha re-julgamentu ne'e, depoisde tribunál tetu faktu hotu, tribunál mantein desizaun primeira instánsia nian bazeia ba artigu 302 (d) Kódigu Penál kona-ba konseitu funcionáriu ne'ebé deskreve katak ema ne'ebé simu funsaun iha atividade públiku provizóriu ka temporáriu ho remunerasaun konsidera nu'udar funcionáriu. Arguidu sira iha funsaun tanba hetan konfiansa no remunerasaun, tanba ne'e arguidu sira tama iha situasaun funcionáriu tuir artigu 302 KP².

Antes ne'e, tribunál primeira instánsia kondena arguidu Gastão de Sousa ba krime pekulatu ho pena prizaun tinan 2 fulan 6, ba krime pekulatu ho uzu kondena ho pena prizaun fulan 1. Husi pena rua ne'e, tribunál akumulá ba pena únika prizaun tinan 2 fulan 6 suspende ba tinan 2 fulan 6. Entretanto ba krime administrasaun danoza (co-autór), tribunál absolve arguidu husi krime ne'e.

Ba arguidu Diogo da Costa, tribunál primeira instánsia kondena arguidu ho pena prizaun tinan 1 ba krime pekulatu no ba krime pekulatu ho uzu tribunál kondena arguidu ho pena prizaun fulan 6. Husi pena rua ne'e, tribunál akumulá hamutuk ba pena únika prizaun tinan 1 fulan 6 suspende ba tinan 1 fulan 6.

6. Krime devasa no ameasa

Nú. Prosesu : 0273/19.DIDIL
Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Hipólito Expsto Martins
Defeza : Dr. Afonso Fátima Gomes
Desizaun : Pena prizaun fulan 6 suspende ba tinan 1

Iha 15 Jullu 2020, Tribunál Distritál Dili, prezide leitura sentesa ba krime devasa no ameasa ne'ebé envolve arguidu SdC hasoru lezada AM no lezadu EA, iha Distritu Dili.

Akuzasaun Prokuradór

Prokuradór akuza katak iha 12 Novembru 2019, iha oras tuku 15:00 lokraik, lezada nia tian haree hela *facebook* no hakfodak inklui sente moe bainhira haree lezada nia foto molik iha *facebook*. Lezada nia foto ne'e *upload* husi arguidu ne'ebé uza ID falsu ho

² (Artigu 302 KP (d) "ema ne'ebé maski provizoriamente ka temporariamente, ho remunerasaun ka gratuitamente, voluntariamente ka obrigatoriamente, simu funsaun atu kaer ka kaer ho ema seluk atividade iha funsaun públika administrativu ka jurisdisionál, ka, iha sirkustánsia hanesan sira-ne'e, ka'er ka ka'er ho ema seluk funsaun iha organizmu ho utilidade públika ka partisipa iha funsaun sira ne'e".

naran JR. Antes ne'e, iha 2018, arguidu no lezada iha relasaun namoru maibé depoisde lezada rona katak arguidu iha ona feen no oan nune'e iha Juñu 2019, lezada hapara sira nia relasaun ne'e. Arguidu la sastifas no ameasa lezada katak "*ha'u sei publika ó nia fotografia iha media sosiál (FB) para ó moe no ha'u mós sei oho mate ó nia família hotu*". Arguidu nia ameasa ne'e halo lezada sente ta'uk no rejigna-an husi serbisu.

Tuir mai iha 16 Outubru 2019, iha oras tuku 12:00 meiodia, arguidu manda mensajen liuhusi *Watshapp* (WA) ba lezadu EA dehan "*ha'u sei oho mate ó*". Arguidu manda mensajen ne'e tanba deskonfia lezadu iha relasaun namoru ho lezada. Maibé reliadade lezadu ho lezada nu'udar kolega serbisu.

Prokuradór akuza arguidu kontra artigu 183 KP kona-ba devasa ho moldura penál to'o tinan 1 ka multa no kontra artigu 157 KP kona-ba ameasa ho moldura penál tinan 1 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak arrepende ninia hahalok ne'e no promete sei la repete tan hahalok hanesan iha futuru. Arguidu mós deklarata katak arguidu atu husu deskulpa maibé lezadu ho lezada lakohi simu.

Entretantu lezada mantein faktu sira iha akuzasaun no hatutan katak depoisde hapara sira nia relasaun liu tiha fulan ida, arguidu públika foto refere iha facebook. Nune'e mós lezadu, konfirma katak ho arguidu nia ameasa ne'e halo lezadu no mós lezada sente tauk to'o lezada sai husi serbisu.

Alegasaun finál

Prokuradór konsidera arguidu komete duni krime devasa no ameasa. Tanba ne'e atu halo prevensaun iha futuru, husu ba tribunál atu kondena arguidu ba krime rua ne'e tuir tribunál nia konviksaun.

Enkuantu defeza husu ba tribunál atu aplika pena ne'ebé justu no kmaan tanba konsidera ba arguidu nia konfisaun, arependimentu, iha vontade atu dame malu ho lezada no lezadu no mós arguidu promete sei la repete tan hahalok hanesan iha futuru.

Desizaun

Depoisde avalia faktu hotu, tribunál prova katak arguidu uza ID falsu iha FB no publika lezada nia *fotografia molik no ameasa lezada no lezadu*. Tribunál mós prova katak arguidu ninia hahalok sira ne'e halo lezada no lezadu tauk to'o lezada rejigna-an husi nia serbisu.

Bazeia ba faktu prova sira ne'e inklui tetu sirkunstánsia atenuante sira hanesan arguidu arrepende ninia hahalok, hakarak dame malu ho lezada no lezadu no promote la repete ninia hahalok ne'e, tribunál kondena arguidu ba kada krime ho pena prizaun fulan neen. Husi pena sira ne'e, tribunál halo akumulasaun no kondena arguidu ho pena prizaun fulan neen suspende ba tinan ida. Tribunál mós kondena arguidu selu indeminizasaun sivil ba lezada hamutuk US\$300.00 inklui kondena arguidu selu kustu judisiál US\$20.00.

7. Krime maus-tratus ba kónjuje

Nú. Prosesu : 0383/18.DIBCR
Kompozisaun Tribunál : Koletivu
Juis : Dr. Argentino Luísa Nunes, Dra. Zulmira Auxiliadora Barros da Silva no Dr. Joao Ribeiro
Ministériu Públiku : Dr. Gostavo da Silva
Defeza : Dr. Estaque Pereira Guterres
Desizaun : Pena Prizaun tinan 3 suspende ba tinan 3

Iha 15 Jullu 2020, Tribunál Distritál Dili prezide leitura sentesa ba krime maus-tratus ba kónjuje ne'ebé envolve arguidu LGP hasoru nia feen, iha Distritu Dili.

Akuzasaun Prokuradór

Prokuradór akuza katak iha 03 Jullu 2018, iha oras tuku 06:00 dadeer, lezada foti arguidu nia telemovel no haree mensajen husi feto ida (AAF). Nune'e lezada haruka tiha mensajen ne'e ba nia telefone. Iha tempu hanesan, arguidu bolu lezada hodi atende ema ne'ebé atu sosa sasan iha sira nia kioske maibé lezada lakohi no hatan ba arguidu dehan "*ita faan sasan mós la folin, ó mak konta ulun bulak ba feto seluk*". Arguidu hatan fali dehan, "*ó ne'e deskonfia-dor*" no arguidu hatudu mensajen sira iha nia telemovel ba lezada maibé lezada la haree mensajen sira ne'e tanba arguidu apaga hotu ona.

Sira kontinua diskute malu no arguidu rasta lezada tama ba kuartu laran no xave tiha odamatan. Arguidu tuku dala tolu iha lezada nia matan parte loos, tuku dala ida iha kakorok, tuku dala barak iha kotuk laran, tuku dala rua iha kabaas no tebe dala rua iha kidan. Lezada konsege halai sai husi uma laran no ba hato'o kedas keixa iha polísia. Arguidu nia hahalok ne'e halo lezada trauma no sente moras iha lezada nia isin loloon tomak no lezada sente moris la feliz iha nia família.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente katak faktu balu loos no balun la loos. Arguidu konfesa katak nia tuku dala barak iha lezada nia kotuk laran tanba lezada mak tebe uluk arguidu nia orgaun seksuál. Arguidu hatutan katak tuku dala rua iha hasan parte karuk no loos, tuku dala rua iha kabaas no tebe dala ida iha kidan. Arguidu rejeita katak la xave odamatan, la tuku dala tolu iha matan parte loos no la tuku iha kakorok. Mezmu nune'e, arguidu arrepende ninia hahalok no di'ak malu ona ho lezada no arguidu konsiente katak agresau ne'ebé nia halo hasoru lezada ne'e hahalok la di'ak nune'e nia sei la repete tan hahalok hanesan iha futuru.

Entretantu, lezada kontinua konfirma faktu sira iha akuzasaun no konfirma ho arguidu nia deklarasaun balun katak sira di'ak malu ona to'o agora.

Alegasaun finál

Prokuradór konsidera arguidu komete duni krime maus-tratus hasoru lezada ne'ebé tuir loos arguidu tenke proteze. Arguidu mós hatene katak baku lezada ne'e hahalok la di'ak, maibé nafatin halo. Nune'e, atu prevene arguidu la halo tan krime hanesan iha futuru, husu ba tribunál atu kondena arguidu ho pena prizaun tinan ida suspende ba tinan rua.

Enkuantu defeza konsidera arguidu konfesa parsialmente ba faktu sira iha akuzasaun, arrepende ona ninia hahalok, dame malu ona ho lezada, promete sei la repete tan hahalok hanesan iha futuru. Tanba ne'e, husu ba tribunál atu aplika pena justu no kmaan ba arguidu.

Desizaun

Depoisde avalia faktu hotu, tribunál prova katak arguidu rasta lezada tama ba kuartu laran no xave tiha odamatan. Iha kuartu laran ne'e, arguidu tuku dala tolu iha lezada nia matan parte loos, tuku dala barak iha kotuk laran, tuku tan dala ida iha kakorok, rasta no tuku dala rua iha kabaas no tebe dala rua iha kidan. Bazeia ba prova sira ne'e no tetu sirkunstánsia atenuante sira hanesan arguidu konfesa, arrepende ona ninia hahalok, di'ak malu ona ho lezada no promete la repete ninia hahalok ne'e iha futuru, nune'e tribunál kondena arguidu ho pena prizaun tinan tolu suspende ba tinan tolu.

8. Krime ofensa ba integridade física simples ho natureza violéncia doméstika

| | |
|----------------------|-----------------------------|
| Nú. Prosesu | : 0009/19.DIDIL |
| Kompozisaun Tribunál | : Singulár |
| Juis | : Dr. Argentino Luísa Nunes |
| Ministériu Públiku | : Dr. Nelson de Carvalho |
| Defeza | : Dr. Sergio Dias Quintas |

Desizaun : Pena Admoestasaun

Iha 17 Jullu 2020, Tribunál Distrital Dili prezide leitura sentesa ba krime ofensa ba integridade fízika simples ne'ebé envolve arguidu BdS hasoru nia feen, iha Distritu Dili.

Akuzasaun Prokuradór

Prokuradór akuza katak iha 29 Dezembru 2018, iha oras tuku 18:00 lokraik, lezada moras hela no husu arguidu atu haree hela sira nia oan maibé arguidu lakohi. Nune'e, lezada foti fatuk ki'ik ida no tuda arguidu maibé la kona. Arguidu nervozu no basa dala rua iha lezada nia hasan parte karuk no loos.

Iha loron hanesan maibé mezumenus iha oras tuku 00:00 kalan fahe rua, lezada sente hamlaha no hader atu han etu maibé tanba lezada la satisfas nafatin ho arguidu nia hahalok iha lokraik ne'e, nune'e lezada foti etu no fakar ba iha arguidu nia oin. Arguidu la simu no tuku dala rua iha lezada nia matan parte karuk no basa dala ida iha lezada nia hasan parte loos. Hafoin lezada tata arguidu nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, arrepende ninia hahalok no promete sei la komete tan hahalok ne'e iha futuru.

Alende ne'e, lezada kontinua konfirma faktu sira akuzasaun no konfirma mós ho arguidu nia deklarasaun katak sira di'ak malu ona.

Alegasaun finál

Prokuradór konsidera arguidu nia hahalok ne'e prenze duni elementu sira husi krime ofensa ba integridade fízika simples bazeia ba arguidu nia deklarasaun no lezada nia konfirmasaun. Konsidera mós sirkunstánsia sira hanesan arguidu foin primeiravés mai hatan iha tribunál, di'ak malu ona ho lezada, iha oan na'in haat. Tanba ne'e, husu ba tribunál atu kondena arguidu ho pena admoestasaun.

Nune'e mós defeza husu ba tribunál atu aplika pena admoestasaun bazeia ba sirkunstánsia atenuante sira hanesan arguidu konfesa faktu sira, arrepende ninia hahalok, primeiravés mai hatan iha tribunál, dame malu ona ho lezada no promete sei la komete tan hahalok ne'e iha futuru.

Desizaun

Depoisde avalia faktu hotu, tribunál prova katak arguidu basa dala rua iha lezada nia hasan parte loos no karuk. Antes ne'e, lezada lori fatuk ki'ik tuda arguidu maibé la kona. Tribunál mós prova katak arguidu tuku dala rua iha lezada nia matan parte karuk no basa dala ida iha hasan nune'e lezada tata iha arguidu nia kotuk laran.

Bazeia ba prova sira ne'e inklui tetu sirkunstánsia atenuante sira hanesan arguidu arrepende ninia hahalok, di'ak malu ona ho lezada no primeiravés mai hatan iha tribunál, nune'e tribunál kondena arguidu ho pena admoestasaun.

9. Krime ofensa ba integridade fízika simples ho natureza violénsia doméstika

Nú. Prosesu : 0213/19 DIDIL
Kompozisaun Tribunál : Singulár
Juis : Dr. Argentino Luísa Nunes
Prokuradór : Dr. Gustavo Augusto da silva Moreira
Defeza : Dr. Marito da Silva (advogadu privadu)
Desizaun : Pena multa US\$60.00

Iha 17 Jullu 2020, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VV hasoru nia feen, iha Distritu Dili.

Akuzasaun Prokuradór

Prokuradór akuza katak iha 25 Setembru 2019, iha oras tuku 08:30 dadeer, iha lezada nia serbisu fatin, arguidu ho lezada diskute malu no arguidu basa dala ida iha lezada nia hasan, basa dala ida iha tilun-hun, dudu lezada monu tun ba rai rezulta liman naksalak no tebe dala ida iha lezada nia kidan. Hafoin lezada ba apresenta keixa iha polísia. Arguidu nia aktu ne'e, rezulta lezada sofre moras no metan iha hasan, tilun-hun no kidan, liman naksalak. Lezada ba halo tratamentu saúde iha Pradet.

Prokuradór akuza arguidu kontra artigu 145 KP kona-ba ofensa integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu deklara katak faktu sira ne'ebé prokuradór imputa ba nia la loos hotu. Arguidu deklara katak lezada mak ba iha arguidu nia serbisu fatin no diskute malu ho arguidu. Lezada mak basa uluk dala ida iha arguidu nia tilun-hun, depois kaer no rakut arguidu nia kazaku no bainhira arguidu dudu ses lezada mak lezada monu tanba fatin ne'e besik hariis-fatin no namdoras. Arguidu rejeta basa no dudu lezada monu ba

rai. Arguidu hatutan katak momentu arguidu ho lezada ba iha eskwadra polísia Kaikoli, lezada sei basa tan arguidu nia kanuruk no tebe tan dala ida iha arguidu nia kotuk laran.

Liutan arguidu deklara katak antes akontesimentu ida ne'e, lezada dala-rua ona halo problema iha arguidu nia serbisu fatin no sira rezolve ona problema ne'e iha arguidu nia *superior* nia fatin. Arguidu rekoñese katak tanba nia abandona lezada ne'e mak halo lezada sofre moras psíkika. Arguidu mós hanoin atu rezolve problema entre arguidu ho lezada maibé tanba seidauk iha kondisaun nune'e seidauk rezolve to'o agora.

Alende ne'e, lezada mós kontinua konfirma faktu sira iha akuzasaun no deklara katak arguidu mak basa uluk lezada, hafoin lezada basa fali arguidu, nune'e arguidu dudu lezada ba haris fatin no tebe lezada nia kidan to'o lezada monu no rezulta liman naksalak. Lezada hatutan katak lezada nia liman naksalak ne'e, ema halo kurativu durante loron tolu mak foin di'ak fali.

Depoisde rona deklarasaun arguidu no lezada, hamosu dúvida ba tribunál nune'e bazeia ba artigu 140 KPP, tribunál decide halo akareasaun ba arguidu no lezada. Iha prosesu akareasaun ne'e, arguidu no lezada mantein ho ida-idak nia deklarasaun antes. Aleinde ne'e lezada ejize nia direitu nu'udar feen.

Testemuña Estevão nu'udar arguidu nia kolega serbisu depoimenta katak nia rona barullu iha liur nune'e testemuña sai ba no haree arguidu ho lezada dudu malu hela nune'e testemuña tun ba kraik no hafahe tiha arguidu no lezada. Kona-ba lezada monu ba rai, testemuña deklara katak la haree. Testemuña depoimenta liutan katak lezada mak ba iha arguidu nia serbisu fatin

Alegasaun finál

Prokuradór haktuir katak iha produsaun ba prova arguidu deklara parsialmente katak faktu balun loos no balun laloos. Arguidu deklara la halo agresaun hasoru lezada, arguidu la baku, la basa, la dudu no la tebe lezada. Maski nune'e lezada konfirma no espresa nia sentimentu ne'ebé sofre fizikamente no psikolojikamente. Ho nune'e, prokuradór konsidera liu ba iha lezada nia deklarasaun no relatóriu médiku husi Pradet hodi konklui katak arguidu nia aktu ne'e prenze duni rekezitu krime nian.

Liutan prokuradór konsidera katak prevensaun importante tebes, liu-liu prevensaun spesiál ba arguidu mezmu la hela hamutuk ona ho lezada no mós prevensaun jerál ba família no comunidade atu eduka ema hotu katak iha meiu seluk atu rezolve problema la'os ho aktu violentu, nune'e husu ba tribunál atu kondena arguidu tuir konviksaun tribunál nian.

Entretantu parte defeza husu ba tribunál atu tetu didi'ak sirkunstánsia sira no fó justisa ba arguidu maski arguidu konfesa parsialmente. Alende ne'e lezada konfirma katak nia ba duni arguidu nia serbisu fatin no halo agresaun uluk hasoru arguidu tanba arguidu abandona lezada.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan no basa dala ida iha tilun-hun. Tribunál mós prova katak arguidu dudu lezada halo monu tun ba rai rezulta liman naksalak hafoin arguidu tebe dala ida iha lezada nia kidan. Mezmu arguidu nega faktu sira iha akuzasaun prokuradór nian, maibé tribunál fiar no konsidera liu ba lezada nia deklarasaun no relatóriu médiku husi Pradet.

Bazeia ba prova sira ne'e no tetu mós sirkunstánsia sira hotu, tribunál konklui prosesu ne'e no kondena arguidu ho pena multa US\$60.00 ne'ebé kada loron arguidu sei selu US\$1.00 durante loron 60. Tribunál mós aplika pena alternativa durante loron 40 iha prizaun kuandu arguidu la selu pena multa refere.

10. Krime ofensa ba integridade fízika simples ho natureza violénsia doméstika

| | |
|---------------------|--|
| Nú. Prosesu | : 0316/19 DIDIL |
| Kompzisaun Tribunál | : Singulár |
| Juis | : Dra. Maria Solana |
| Prokuradór | : Dr. Gustavo Augusto da silva Moreira |
| Defeza | : Dr. Humberto Alves |
| Desizaun | : Pena multa US\$ 45.00 |

Iha 20 Jullu 2020, Tribunál Distritál Dili prezide julgamentu leitura sentensa ba krime ofansa ba integridade fízika simples ho natureza violénsia doméstika ne'ebé envolve arguidu EdJ hasoru nia feen, iha Distritu Dili.

Akuzasaun Prokuradór

Prokuradór akuza katak iha 15 Dezembru 2019, iha oras tuku 16:00 lokraik, arguidu ba partisipa festa Natal hamutuk ho nia kolega sira. Lezada ho sira nia oan hela iha uma, maibé tanba labarik isin manas maka'as, nune'e lezada telefone haruka arguidu fila sedu. Bainhira arguidu to'o iha uma, arguidu diskute malu kedas ho lezada no tuku dala haat iha lezada nia ulun. Lezada ba apresenta keixa maibé lezada la ba halo tratamentu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu konfesa integralmente ba faktu sira no deklara katak depoide akontesimentu ne'e liu tiha semana ida sira di'ak malu fali. Arguidu mós deklara katak arrepende ninia hahalok ne'e, husu ona deskulpa ba lezada no promete sei la komete tan hahalok ne'e iha futuru.

Aleinde ne'e lezada mós kontinua konfirma faktu sira iha akuzasaun no deklara katak lezada telefone arguidu maizumenus iha oras tuku 21:00 kalan maibé arguidu la simu no arguidu foin fila iha oras tuku 03:00 madrugada. Lezada hatutan katak momentu arguidu to'o uma, lezada ko'alia no trata aat hasoru arguidu. Nune'e arguidu tuku iha lezada nia ulun. Lezada mós konfirma deklarasaun arguidu nian katak liutiha semana ida mak sira di'ak malu fali. Tanba iha momentu ne'ebá, depoisde akontesimentu ne'e lezada ho labarik ba hela tiha iha lezada nia família no liutiha semana ida mak arguidu foin ba no lori fila lezada ho sira nia-oan mai uma no di'ak malu to'o agora.

Alegasaun finál

Prokuradór haktuir katak arguidu konfesa integralmente ba faktu sira no lezada mós kontinua konfirma. Bazeia ba ne'e, konsidera arguidu nia aktu ne'e prenze duni rekezitu krime ne'e nian, nune'e husu ba tribunál atu kondena arguidu tuir konviksaun tribunál nian.

Entretantu defeza husu ba tribunál atu aplika pena ne'ebé adekuaudu ba arguidu tanba arguidu konfesa integralmente ba faktu sira, konsidera mós sirkunstánsia atenuante sira hanesan arguidu foin primeiravés mai hatan iha tribunál no arrepende ona ninia hahalok.

Desizaun

Depoisde avalia faktu hotu, tribunál prova katak arguidu tuku dala haat iha lezada nia ulun. Bazeia ba prova sira ne'e no tetu mós sirkunstánsia atenuante sira hanesan arguidu arrepende ninia hahalok no di'ak malu ona ho lezada to'o agora, nune'e tribunál konklui prosesu ne'e no kondena arguidu ho pena multa US\$45.00 ne'ebé kada loron arguidu sei selu US\$1.00 durante loron 45. Bainhira arguidu la selu multa refere, arguidu sei kumpri iha prizaun durante loron 30 nu'udar pena alternativu.

11. Krime ofensa ba integridade fízika simples ho natureza violénsia doméstika
Nú. Prosesu : 0483/19 DICMR

Kompozisaun Tribunál : Singulár
Juis : Dr. Ivan José Suritay Patrocínio Antonino Gonçalves
Prokuradór : Dr. Gustavo Augusto da Silva Moreira
Defeza : Dr. Jonas Henrique
Desizaun : Pena multa \$140.00

Iha 22 Jullu 2020, Tribunál Distritál Dili prezide julgamentu leitura sentensa ba krime ofensa ba integridade física simples ho hatureza violénsia doméstika ne'ebé envolve arguidu AS hasoru nia feen, iha Distritu Dili.

Akuzasaun Prokuradór

Prokuradór akuza katak iha 02 Setembru 2019, iha oras tuku 20:00 kalan, arguidu husu lisensa ba lezada atu ba toba iha nia kolega nia uma maibé lezada la hatan. Nune'e sira diskute malu no arguidu tuku dala tolu iha lezada nia tilun-hun, tuku dala ida iha ibun, tuku dala rua iha kidan parte karuk, tuku tan dala rua iha kotuk laran, liki lezada to'o lezada monu tun ba rai, tebe lezada nia hirus-matan, tuku dala ida iha tilun-hun, rakut lezada nia kakorok no tuku dala ida iha kabun. Aktu sira ne'e rezulta lezada sofre moras iha kidan, kabun, kotuk laran, bubu iha hirus matan, tilun-hun no kanek iha ibun no kakorok. Lezada ba halo tratamentu médiku iha Sentru Saúde Vera-Cruz.

Prokuradór akuza arguidu kontra artigu 145 KP kona-ba ofensa integridade física simples ho moldura penál to'o tinan 3 ka multa, konjuga ho artigu 2, 3(a) no 35(b) no 36 LKVD.

Produsaun ba prova sira

Iha julgamentu, arguidu konfesa parsialmente katak la tuku lezada nia kidan maibé rekoñese agresaun sira seluk. Arguidu hatutan katak depoisde akontesimentu liutiha fulan ida sira foin di'ak malu fali, maibé iha fulan Dezembru mosu tan problema no sira hela fahe malu to'o agora maibé haree malu di'ak nafatin. Arguidu mós deklarata katak arrepende ninia hahalok sira ne'e. Liutan arguidu hateten katak antes ne'e nia iha ona antesidente kriminál.

Entretantu, lezada kontinua konfirma faktu sira iha akuzasaun no deklarata lezada nia inan-aman mak lori lezada ba halo tratamentu iha sentru saude. Lezada mós konfirma arguidu nia deklarasaun katak iha fulan Dezembru mosu tan problema nune'e sira hela fahe malu to'o agora, maibé sira di'ak malu nafatin.

Alegasaun finál

Prokuradór haktuir katak maski arguidu konfesa parsialmente maibé nia halo duni agresaun hasoru lezada no lezada mós konfirma. Mezmu arguidu no lezada la hela

hamutuk ona maibé arguidu iha ona antesidente krimínál, nune'e ho sériu husu atu fó atensaun ba prevensaun espesiál ba arguidu no halo prevensaun jerál ba sociedade hodi nune'e família no sociedade sira bele hatene katak instituisaun Estadu la tolera ba asaun krime sira hanesan ne'e, tanba ne'e husu ba tribunál atu kondena arguidu ho pena prizaun maibé suspende nia ezekusaun tuir tribunál nia konviksaun.

Entretantu defeza husu ba tribunál atu fó kastigu ne'ebé adekuaudu ba arguidu tanba arguidu konfesa faktu ida no arguidu arrepende ona ninia hahalok.

Desizaun

Depoisde avalia faktu hotu, tribunál prova katak arguidu tuku dala tolu iha lezada nia tilun-hun, tuku dala ida ihaibun, tuku dala rua iha kidan parte karuk, tuku tan dala rua iha kotuk laran, liki lezada to'o lezadu monu tun ba rai, tebe lezada nia hirus-matan, tuku dala ida iha tilun-hun, hafoin rakut lezada nia kakorok no tuku tan dala ida iha kabun. Tanba ne'e, tribunál fiar liu ba lezada nia deklarasaun. Enkuantu kona-ba antesidente krimínál tribunál la prova, tanba depoisde halo verifikasaun iha sistema, arguidu primeiravés mai hatan iha tribunál.

Bazeia ba prova sira ne'e no tetu mós sirkunstánsia atenuante sira hanesan arguidu arrepende ninia hahalok, di'ak malu nafatin maski fahe malu ona ho lezada. Alende ne'e arguidu laiha antesidente krimínál tuir rezultadu verifikasaun iha sistema, nune'e tribunál konklui porsesu ne'e no kondena arguidu ho pena multa US\$140.00 ne'ebé kada laron arguidu sei selu \$1.00 durante laron 140. Bainhira arguidu la selu pena multa refere, arguidu sei kumpre iha prizaun durante laron 93 nu'udar pena alternativu.

12. Kazu sivíl regulasaun ba ezersísiu podér paternál

Nú. Prosesu : 0034/2019.PAD
Kompozisaun Tribunál : Singulár
Juis : Dra. Fransisca Cabral Marques
Prokuradór : Dr. Gustavo da Silva (representa menór)
Defeza : Dr. José da Silva
Desizaun : Omologa dezisténsia keixa

Iha 22 Jullu 2020, Tribunál Distritál Dili prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór sira hanesan MdS (idade tinan 3), FdS (idade tinan 1 fulan 2) hasoru rekeridu SdS (membru PNTL-BOP) no rekerida EdR, nu'udar autór sira nia inan no aman, iha Distritu Dili.

Termu no fundamentu sira:

Iha Agostu 2017, rekerida grávida fulan tolu ba sira nia oan sigundu no momentu ne'e rekeridu la entrega ona saláriu ba rekerida ho nia oan sira. Ho nune'e mosu problema no la konsege rezolve no ikus sira hela fahe malu (separa). Tuir mai iha Janeiru 2018, rekerida hahoris sira nia oan sigundu. To'o agora rekeridu la fó alimentasaun ba menór sira.

Rekeridu hanesan membru PNTL ho saláriu kada fulan US\$445.00 iha kondisaun ekonómia ne'ebé sufsiente atu fó ba menór sira.

Kazu ne'e relaciona ho ezersísiu podér paternál tuir artigu 1757, 1758(1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

Tentativa Konsilisaun

Iha julgamentu tentativa konsilisaun ne'e, rekeridu no rekerida konkorda atu menór sira nafatin hela ho sira nia avo (rekerida ninia inan-aman) iha Ermera, tanba rekerida agora dadaun serbisu iha Dili.

Rekeridu mós sei fó alimentasaun ba nia oan sira kada fulan US\$110.00 no sei transfere liuhusi rekerida nia konta bankaria iha BNCTL. Osan refere sei transfere komesa loron 25 ou bele to'o iha 27 Agostu. Kona-ba regra vizita nian arguidu livre atu ba vizita, importante mak komunika antes ba rekerida kuandu atu ba vizita menór sira.

Alegasaun finál

Prokuradór reprezenta menór husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór sira.

Alende ne'e defeza mós konkorda ho alegasaun prokuradór nian no husu ba tribunál omolga akordu ne'e.

Desizaun

Bazeia ba parte rua nia akordu kona-ba alimentasaun, hela fatin no rejime vizita, tribunál konklui prosesu ne'e no omologa akordu ne'e.

13. Kazu sivíl regulasaun ba ezersísiu podér paternál

Nú. Prosesu : 0152/18.PAD
Kompozisaun Tribunál : Singulár
Juis : Dr. António Helder Viana do Carmo
Prokuradór : Dr. Gustavo da Silva (reprezenta menór)

Defeza : Dr. José da Silva
Desizaun : Omologa dezisténsia keixa

Iha 22 Jullu 2020, Tribunál Distritál Dili prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór ZdJ (idade tinan 16) hasoru rekeridu JdS no rekerida FdJ, nu'udar autór nia inan-aman, iha Distritu Dili.

Termu no fundamentu sira:

Iha 27 Maiu 2016, rekeridu sai husi sira nia uma hodi ba hela fali hamutuk ho nia alin sira. Momentu sai husi uma rekeridu hateten kedas ba rekerida katak rekeridu sei ba hela iha kampung-Alor no rekerida ho labarik sira la bele ba foti tan osan arenda uma nian ne'ebé sira fó aluga ba ema. Osan arendamentu uma nian ne'e fulan ida US\$400.00 hodi sustenta sira nia oan. Bainhira rekerida ho nia oan atu ba foti osan ne'e rekeridu foti hotu ona no la husik hela osan balu ba nia oan sira. Rekeridu mós la fó nia saláriu ba nia oan sira, nune'e halo rekerida la kontente. Komesa iha 2016 rekeridu abandona hela nia oan sira no la fó alimentasaun ba sira.

Rekeridu hanesan motorista iha Tribunál Rekursu ne'ebé ho saláriu kada fulan US\$130.00, iha kondisaun hodi fó alimentasaun ba menór. Enkuantu rekerida la iha kondisaun ekonómia hodi fó alimentasaun ba menór.

Kazu ne'e relasiona ho ezersísiu podér paternál tuir artigu 1757, 1758(1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

Tentativa Konsilisaun

Iha julgamentu tentativa konsiliaun ne'e, rekeridu no rekerida iha konkordansia katak menór nafatin hela ho rekerida, rekeridu sei fó alimentasaun ba menór kada fulan US\$ 35.00 no sei transfere liuhusi menór nia konta bankária iha BNCTL. Osan refere sei transfere komesa iha fulan Jullu. Entretantu kona-ba regra vizita iha loron feriadu menór bele ba halimar iha rekeridu nia uma.

Alegasaun finál

Prokuradór representa menór husu ba tribunál atu omologa akordu ne'ebé rekeridu no rekerida konkorda hamutuk ona ba interese labarik nian.

Alende ne'e defeza mós konkorda ho alegasaun prokuradór nian no husu ba tribunál omolga akordu ne'e.

Desizaun

Bazeia ba parte rua nia akordu kona-ba alimentasaun, hela fatin no rejime vizita, tribunál konklui prosesu ne'e no omologa akordu ne'e.

14. Krime falsifikasaun agravadu

Nu. Prosesu : 0115/19 PGGCC
Kompozisaun Tribunál : Koletivu
Juis : Dr. João Ribeiro, Dr. Argentino L. Nunes no Dra. Zulmira
Auxiliadora Barros da Silva
Prokuradór : Dr. Luis Hernani Rangel da Cruz
Defeza : Dra. Joana Cristina Pinto
Desizaun : Pena prizaun fulan 6 suspende ba tinan 1

Iha 24 Jullu 2020, Tribunál Distritál Dili prezide julgamentu leitura akordaun ba krime falsifikasaun agravadu ne'ebé envolve arguida Marta do Santos Sousa no arguidu Hermenegildo do Santos Sousa, iha Distritu Dili.

Akuzasaun Prokuradór

Prokuradór akuza arguidu no arguida katak durante okupasaun Indonézia arguida hela iha Semarang-Indonézia no iha oan ida naran Hermenegildo (arguidu) ne'ebé moris no sarani iha Semarang-Indonézia. Iha 1999, arguida no arguidu sira fila mai Timor-Leste. Iha 2015, arguidu fó osan US\$25.00 ba arguida hodi trata arguidu nia sertidaun batismu tanba arguidu atu ba serbisu iha Inglatera. Arguida lori duni osan US\$25.00 refere ba iha Igreja Balide hodi hasoru malu ho Sra. Josefina atu muda arguidu nia sertidaun batismu ne'e. Arguida entraga osan US\$25.00 ne'e ba Sra. Josefina hanesan funsionáriu iha Igreja Balide. Sra. Josefina muda duni arguidu nia moris fatin iha Semaarang tau fali Dili maibé loloos ne'e arguidu moris iha Indonézia, ho número asentu 339 ne'ebé ema seluk nian. Tanba ne'e, Sra. Josefina hatan ona ba aktu ne'ebé nia komete no hetan ona kondensasaun.

Prokuradór akuza arguidu sira kontra artigu 304 (1) KP kona-ba falsifikasaun agravadu ho moldura penál tinan 2 to'o tinan 6.

Produsaun ba prova sira

Iha julgamentu, arguida deklara katak antes ne'e nia ba hasoru Amu Bispu Dom Alberto Ricardo da Silva atu trata arguidu nia sertidaun batismu no iha altura ne'ebá Amu Ricardo fó despaixu ida ba arguida nune'e arguida lori arguidu nia sertidaun batismu ba trata iha Igreja Balide. Arguida mós deklara katak nia hatene katak Sra. Josefina muda hotu arguidu nia moris fatin husi Indonézia no tau fali Dili. Arguida deklara katak nia ba husu renova arguidu nia sertidaun ne'e tanba arguidu hakarak ba serbisu iha Inglatera.

Arguida mós la hatene katak renova sertidaun ne'e nu'udar krime ida, arguida arrende ninia hahalok no promete sei la komete tan hahalok ne'e iha futuru.

Aleinde ne'e, arguidu deklara katak altura ne'e nia serbisu iha Suai no bainhira nia fila mai Dili mak arguidu fó osan US\$25.00 ba arguida hodi ba trata sertidaun refere tanba nia hakarak ba serbisu iha Inglatera. Arguidu deklara mós katak nia la hatene kona-ba falsifikasaun sertidaun ne'e, arguidu mós hakfodak kuandu notifikasaun husi ministériu públiku atu ba presta deklarasaun.

Testemuña Cicilia do Santos no Fernando do Rosario ne'ebé serbisu Igreja Balide depoimenta katak sira la koñese arguida no arguidu no nunca hasoru malu no trata arguidu sira nia sertidaun batismu maibé normalmente kuandu atu trata sertidaun batismu iha igreja Balide, ema refere tenke sarani iha igreja refere no nia naran tenke iha livru boot no número asentu iha sertidaun ne'e ema ida-idak nian.

Alegsaun finál

Prokuradór konsidera arguidu sira provadu komete krime falsifikasaun agravadu tuir akuzasaun prokuradór nian, tanba ne'e maski arguidu sira konfesa, arrende sira ninia hahalok, husu ba tribunál atu kondena arguidu sira ho pena prizaun tinan ida suspende ba tinan ida.

Enkuantu defeza husu ba tribunál atu absolve arguidu sira tanba arguida no arguidu sira renova sertidaun ne'e tanba hetan despaixu husi Amu Bispu, arguidu sira mós la hatene katak renova sertidaun ne'e nu'udar krime ida. Sira arrende ona sira ninia hahalok ne'e no promete sei la komete tan hahalok ne'e iha futuru.

Desizaun

Depois avalia faktu hotu, tribunál prova katak arguidu provadu fó osan US\$25.00 ba arguida (arguidu nia inan) hodi trata sertidaun batismu iha Igreja Balide. Arguida hasoru Sr. Josefa hodi muda arguida nia sertidaun batismu (husi Indonezia nian tau fali Dili) no tau número asentu ema seluk nian iha arguidu nia sertidaun. Bazeia ba faktu provadu sira ne'e, tetu mós sirkunstánsia hotu-hotu ne'ebé iha, tribunál konklui no kondena arguidu sira ho pena prizaun fulan neen suspende tinan ida.

15. Krime ofensa ba integridade física simples ho natureza violéncia doméstika

| | |
|----------------------|---------------------------|
| Nú. Prosesu | : 0570/19.DICMR |
| Kompozisaun Tribunál | : Singulár |
| Juis | : Dra. Ersília de Jesus |
| Ministériu Públiku | : Dr. Nelson de Carvailho |
| Defeza | : Dr. Marçal Mascarenhas |

Desizaun

: Pena Multa US\$150.00

Iha 27 Jullu 2020, Tribunál Distritál Dili prezide leitura sentesa ba krime ofensa ba integridade fízika simples ne'ebé envolve arguidu LGP hasoru nia feen, iha Distritu Dili.

Akuzasaun Prokuradór

Prokuradór akuza katak iha 14 Outubru 2019, iha oras tuku 17:00 lokraik, arguidu husi Ermera atu mai foti lezada iha Dili ba fali Ermera. To'o iha uma, arguidu dehan ba lezada atu prepara-an ba Ermera maibé lezada lakohi tanba lezada hein hela kioske nune'e arguidu foti motor no ba mesak Ermera. Iha dalan klaran arguidu filafali mai uma no haree lezada tuur halimar hela karta. Arguidu nervozu no ho motor soke lezada nia ain parte karuk. Lezada hamrik no sees-an tiha maibé arguidu foti kapasete no baku dala tolu iha lezada nia kotuk laran no baku dala ida iha ulun.

Hafoin, arguidu dada lezada tama ba uma laran no taka tiha odamatan. Iha ne'ebá arguidu tuku no tebe lezada nia kotuk laran, kabun, hirus-matan no ibun. Arguidu kontinua riba lezada ba kama leten no atu buti lezada nia kakorok maibé la konsege tanba lezada hakilar. Arguidu kontinua nia asaun, kaer lezada nia fu'uk no kesi tiha ba iha kama ulun no arguidu kontinua tuku dala barak iha lezada nia kabun, kotuk laran, hirus-matan no rakut iha ibun.

Agresaun ne'e halo lezada sente moras iha ain, ulun, kotuk laran, no kanek iha kakorok no ibun. Hafoin ne'e lezada ba halo tratamentu iha Ospital Nasionál Guido Valadares.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu konfesa parsialmente katak faktu balun loos no balun la loos. Arguidu deklara katak nia hanesan kondutór no fila husi Ermera atu mai tula lezada lori ba fali Ermera tanba iha asuntu familia ida. Arguidu mós deklara katak nia la lori kapasete baku dala tolu maibé dala ida iha lezada nia kotuk laran, la tuku dala barak iha lezada nia isin loloon no la buti lezada nia kakorok. Arguidu mós la dada lezada nia fu'uk no la kesi lezada nia fu'uk ba kama ulun. Arguidu rekoñese dada lezada tama ba uma laran maibé la taka odamatan. Arguidu mós rekoñese katak basa duni dala tolu iha lezada nia hasan parte karuk no tuku dala rua iha kabun.

Entretantu lezada kontinua konfirma faktu sira hotu iha akuzasaun no deklara mós katak iha momentu ne'ebá lezada halimar *bingo* iha viziñu sira nia uma. Lezada htutan

katak depoisde akontesimentu ne'e sira di'ak malu kedas, no to'o agora arguidu la baku ona lezada.

Alegasaun finál

Prokuradór konsidera arguidu provadu komete krime sira tuir faktu iha akuzasaun maski arguidu deklara parsialmente. Tanba ne'e, atu prevene arguidu la halo tan krime hanesan iha futuru, husu ba tribunál atu kondena arguida ho pena prizaun tinan ida suspende ba tinan rua.

Enkuantu defeza konsidera maski arguidu konfesa parsialmente ba faktu sira iha akuzasaun maibé husu atu konsidera sirkunstánsia sira hanesan arguidu arrepende ona ninia hahalok, dame malu ona ho lezada no to'o agora la repete ninia hahalok ne'e. Tanba ne'e, husu ba tribunál atu aplika pena ne'ebé justu no kmaan.

Desizaun

Depois avalia faktu hotu, tribunál prova katak arguidu lori motor no soke lezada nia ain parte karuk. Tribunál mós prova katak arguidu lori kapasete no baku lezada nia kotuk laran, dada lezada tama ba uma laran no taka odamatan, hafoin tuku no tebe lezada nia kotuk laran, kabun, hirus-matan no ibun. Tribunál prova tan katak arguidu riba lezada ba kama leten, atu buti lezada nia kakorok maibé la konsege tanba lezada hakilar, hafoin kesi lezada nia fu'uk ba iha kama ulun no kontinua tuku dala barak iha lezada nia kabun, kotuk laran, hirus-matan no rakut iha ibun.

Bazeia ba prova sira ne'e, tribunál kondena arguidu ho pena multa US\$150.00, ne'ebé kada loron arguidu sei selu US\$1.00. Tribunál mós aplika pena alternativa loron 100 iha prizaun bainhira arguidu la selu pena multa refere.

16. Krime ofensa ba integridade fízika simples ho natureza violénsia doméstika

Nú. Prosesu : 0050/19.ALSIC
Kompozisaun Tribunál : Singulár
Juis : Dra. Maria Solana da Conceição das Neves
Ministériu Públiku : Dr. Nelson de Cravalho
Defeza : Dr. Agostinha de Oliveira
Desizaun : Pena admoestasaun

Iha 27 Jullu 2020, Tribunál Distritál Dili prezide leitura sentesa ba krime ofensa ba integridade fízika simples ne'ebé envolve arguidu PdS hasoru nia oan ne'ebé sei menoridade, idade tinan 7, iha Distritu Aileu.

Akuzasaun Prokuradór

Prokuradór akuza katak iha 07 Agostu 2019, iha oras tuku 10:30 dadeer, arguidu lori aifarina kain baku dala haat iha lezada nia kotuk laran. Agresaun ne'e halo lezada sente moras iha kotuk laran no lezada ba halo tratamentu iha Sentru Saúde Aileu, maibé la anexa atestadu médiku iha auto.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(b), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzausan no deklarata katak arrepende ninia hahalok ne'e. Aguidu mós deklarata katak to'o agora arguidu la baku tan ona lezada no promote sei la komete hahalok ne'e iha future.

Alende ne'e, lezada mós kontinua konfirma faktu sira iha akuzasaun no reforsa arguidu nia deklarasaun katak to'o agora arguidu la baku ona lezada.

Alegasaun finál

Prokuradór konsidera arguidu nia hahalok ne'e prenze duni elementu sira husi krime ofensa ba integridade física simples bazeia ba arguidu nia konfisaun no lezada nia konfirmasaun. Maibé tanba depois akontesimentu ne'e arguidu la baku ona lezada, nune'e husu ba tribunál atu kondena arguidu ho pena admoestasaun.

Defeza konsidera arguidu konfesa faktu sira iha akuzasuan, arrepende ninia hahalok no arguidu la baku ona lezada. Tanba ne'e, husu ba tribunál atu aplika pena admoestasaun.

Desizaun

Depoisde avalia faktu hotu, tribunál prova katak arguidu foti aifarina kain no baku dala haat iha lezada nia kotuk laran. Bazeia ba prova sira ne'e no tetu ba sirkunstánsia atenuante sira hanesan arguidu konfesa, arrepende ninia hahalok no promete sei la komete tan krime hanesan iha futuro, nune'e tribunál kondena arguidu ho pena admoestasaun.

17. Krime ofensa ba integridade física simples ho natureza violénsia doméstika

Nú. Prosesu : 0646/19.DICMR
Kompozisaun Tribunál : Singulár
Juis : Dr. Argentino Luísa Nunes
Ministériu Públiku : Dr. Gostavo da Silva

Defeza : Dr. Jonas Henrique da Costa
Desizaun : Pena prizuan tinan 1 suspende ba tinan 1

Iha 30 Jullu 2020, Tribunál Distritál Dili prezide leitura sentesa ba krime ofensa ba integridade fízika simples ne'ebé envolve arguidu PLS hasoru hasoru nia feen, iha Distritu Aileu.

Akuzasaun Prokuradór

Prokuradór akuza katak iha 19 Novembru 2019, iha oras tuku 19:00 kalan, arguidu tuku dala ida iha lezada nia hirus-matan halo lezada dada iis ladi'ak no tuur tun tiha ba rai. Hafoin arguidu hodi *stik* no baku dala ida iha lezada nia kotuk laran rezulta moras maka'as no halai ba keixa iha polísia. Antes akontesimentu ne'e, lezada ba toba tiha iha lezada nia inan-aman sira sein koñesimentu arguidu nian tanba bee laiha. Ho nune'e mosu agresaun sira ne'e hasoru lezada. Arguidu hatene katak violénsia ne'ebé nia komete hasoru lezada ne'e kontra lei maibé arguidu nafatin halo violénsia hasoru lezada rezulta lezada nia kotuk laran no hirus-matan moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu konfesa faktu hotu iha akuzasaun no deklara katak arrepende ninia hahalok ne'e. Arguidu mós konsiente katak tuku lezada nia hirus-matan no uza *stik* baku iha lezada nia kotuk laran nu'udar hahalok ladi'ak. Maibé di'ak malu ona ho lezada no nafatin moris hanesan feen-laen. Arguidu mós hatutan katak foin primeiravés mai hatan iha tribunál.

Alende ne'e, lezada mós kontinua konfirma faktu sira iha akuzasaun no reforsa arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun finál

Prokuradór konsidera arguidu ninia hahalok ne'e provadu hasoru lezada. Maibé tanba sira di'ak malu ona to'o agora, nune'e husu ba tribunál atu kondena arguidu ho pena admoestasaun.

Nune'e mós defeza husu ba tribunál atu kondena arguidu ho pena admoestasaun tanba konsidera arguidu nia konfisaun, arependimentu no to'o agora la halo violénsia hasoru lezada.

Desizaun

Depoisde avalia faktu hotu, tribunál prova katak arguidu tuku dala ida iha lezada nia hirus-matan halo lezada dada iis ladi'ak no tuur tun tiha ba rai. Tribunál mós prova katak arguidu lori *stik* no baku dala ida iha lezada nia kotuk laran. Bazeia ba faktu prova sira ne'e no tetu mós sirkuntánsia atenuante sira hanesan arguidu arrepende ona ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui no kondena arguidu ho pena prizaun tinan ida suspende ba tinan ida.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: 3323883 | 77040735

Website: <https://jsmp.tl/>